



王荆公唐百家詩選卷第十一

劉商九首

羊士諤十七首

長孫佐輔十三首

李約三首

竇常二首

竇牟一首

竇群一首

竇庠一首

竇鞏八首

劉商九首

送劉南史往杭州拜覲別駕叔

兄弟漂零自長年見君眉白轉相憐清揚似玉
須勤學富貴由人不在天萬里榛蕪迷舊國兩

河烽火復相連林中若使題書信但向漳濱訪
客船

合溪送王永歸東郭

君去春山誰共遊鳥啼花落水空流如今送別
臨溪水他日相思來水頭

春日臥病書情

楚客經年病孤舟人事稀晚晴江柳變春夢塞
鴻歸今日方知命前年自覺非不能憂歲計無
限故山薇

銅雀妓

魏主矜蛾眉美人美於玉高臺無晝夜歌舞竟
未足盛色如轉圓夕陽落深谷仍令身歿後尚
縱平生慾紅粉橫淚痕調絃向空屋舉頭君不
在唯見西陵木玉輦豈再來嬌鬟爲誰綠那堪
秋風裏更舞陽春曲曲罷情不勝闌干向西哭
臺邊生野草來去胷羅縠况復陵寢間雙雙見
麋鹿

綠珠怨

從來上臺榭不敢倚欄干零落知成血高樓直
下看

唐詩十一
醉後口號

春草秋風老此身一瓢長醉任家貧
醒來還愛浮萍草漂寄官河不屬人

秋夜聽嚴紳巴童唱竹枝歌

巴人遠從荆江客回首荆山楚雲隔
思歸夜唱竹枝歌庭槐葉落秋風多
曲中歷歷叙鄉思鄉思綿綿楚詞古
身騎吳牛不畏虎手提蓑笠欺風雨
猿啼日暮江岸邊綠林連山水連天
來時十三今十五一成新衣已再補
鴻雁南飛報隣伍在家懽樂辭家苦
天晴露白鍾漏遲淚痕滿

面看竹枝曲終寒竹風裊裊西方日落東方曉

柳條歌送客

露井夭桃春未到遲日猶寒柳開早
高枝低枝飛鷗黃千條萬條覆官墻
幾回離別折欲盡一夜東風吹又長
毵毵拂人行不進依依送君無遠近
青春去住隨柳條却寄來人以為信

雜言同豆盧郎中郭南七里橋哀悼姚
倉曹

橋邊足離別終日為悲辛登橋因歎逝
却羨別離人橋下東流水芳樹櫻桃蘂
流水與潮回花

落明年開可憐三品椽長作九泉灰宿昔懽遊
在何處花前飲足求仙去

羊士諤十七首

過三鄉望女几山早歲有卜築之志

女几山頭春雪消路傍仙杏發柔條心期欲去
知何日惆悵迴車上野橋

和都官李郎中經宮人斜

翡翠無窮掩夜泉猶疑一半作神仙秋來還照
長門月珠露寒花是野田

郡中即事二首

紅衣落盡暗香殘葉上秋光白露寒越女含情
已無限莫教長袖倚闌干
登臨何事見瓊枝白露黃花自遶籬唯有樓中
好山色稻畦殘水入秋池

小園春至偶書呈吏部竇郎中孟員外

松篠雖苦節冰霜慘其間欣欣發佳色如喜東
風還幽抱想前躅冥鴻度南山春臺一以眺達
士亦解顏偃息非老圃沉吟闕玄關馳暉忽復
失壯歲不得閑君子當濟物丹梯難共攀心期
自有約去掃蒼苔斑

登樂遊原寄司封孟郎中盧補闕

爽節時清眺秋懷悵獨過神臯值宿雨曲水已
增波白鳥陵風迴紅蕖濯露多伊川有歸思君
子復如何

郡樓晴望

霽色朝雲盡亭臯露亦晞寒開臨曲檻蕭瑟換
輕衣地遠秦人望天晴社燕飛無功慙歲晚惟
念故山歸

九月十日郡樓獨酌

椽史當授衣郡中稀物役嘉辰悵已失殘菊誰

爲惜櫺軒一樽泛天景洞虛碧暮節獨賞心寒
江鳴湍石歸期北州里舊友東山客飄蕩海雲
深相思桂花白

梁國惠康公主挽歌詞二首

特詔令百官進
詩駙馬即司空

于公
之子

湯沐成塵跡山林遂寂寥鵲飛應織素鳳起獨
吹簫玉殿中叅罷雲輶上漢遙皇情悲不極空
輟未央朝

授冊榮天使陳詩感聖恩河山啓梁國縞素及
于門泉向金卮咽霜來玉樹繁都人聽哀挽淚

盡望寒原

林館避暑

池島清陰裏無人泛酒船
山蛭金奏響花露水
精圓靜勝朝還暮幽觀
白已玄家林正如此何
事賦歸田

寒食宴城北山池即故郡守滎陽鄭綱
目爲折柳亭

別館青山郭遊人折柳行
落花經上已細雨帶
清明鶗鴂流芳暗鴛鴦
曲水平歸心何處醉寶
瑟有餘聲

夜聽琵琶

破撥聲繁恨已長
低鬟斂黛更摧藏
潺湲隴水聽難盡
併覺風沙繞杏梁

酬蕭使君出妓夜宴見送

玉顏紅燭忽驚春
微步凌波拂暗塵
自是當歌斂眉黛
不應惆悵爲行人

西川獨孤侍御見寄七言四韻一來爲
郡翰墨都捐逮此酬荅誠乖拙速

百雉層城上將壇列營
西照雪峰寒文章立事
須銘鼎談笑論功恥據
鞍草檄青油推健筆曳

唐詩十一
九
裾黃閣聳危冠雙金未比三年字負弩空慙知者難

息舟荆溪入陽羨南山遊善權寺呈李功曹巨

結纜蘭渚曉柴車上連岡晏溫值初霽去遶山河長獻歲冰雪盡細泉生路傍行披煙杉入激瀾橫石梁層閣表精廬飛甍切雲翔冲襟得高步清眺極遠方潭嶂積佳氣萸萸多早芳具觀澤國秀重使春心傷念遵煩促途榮利鶩隙光勉君脫冠意共匿無何鄉

永寧里園亭休沐悵然成詠

雲景含初夏休歸曲陌深幽簾宜永日珍樹始清陰遲客唯長簟忘言有匣琴画披靈物態書見古人心芳草多留步鮮飗自滿襟勞形非立事蕭灑去頭簪

長孫佐輔十三首

德宗時人弟公輔為吉州刺史佐輔往依焉

尋山家

獨訪山家歇還涉茅屋斜連隔松葉主人聞語未開門繞籬野菜飛黃蝶

荅邊信

唐人去年戍遼水夜得邊書字盈紙揮刀就燭
裁紅綺結作同心荅千里君寄邊書書莫絕妾
荅同心心自結同心再解心不離書字頻看字
愁滅結成一夜和淚封貯書只在懷袖中莫如
書字固難久願學同心長可同

山居雨霽即事

結茅蒼嶺下自與喧卑隔况值雷雨晴郊原轉
岑寂出門看反照繞屋殘溜滴古路絕人行荒
陂響螻蝈籬崩瓜豆蔓圃壞牛羊跡斷續古祠
鴉高低遠村笛喜聞東臯潤欲往未通屐杖策

試危橋攀蘿瞰苔壁隣翁夜相訪緩酌聊跂石
新月出汗罇浮雲在中鳥常隳腐儒操謬習經
邦畫有待時未知非關慕沮溺

擬古詠河邊枯樹

野火燒枝水洗根數圍枯樹半心存應是無機
承雨露却將春色寄苔痕

對鏡吟

憶昔逢君新納娉青銅鑄出千年鏡意憐光彩
固無瑕義比恩情永相映每將鑿面兼鑿心鑿
來不輟情逾深君非結心空結帶結處尚新恩

唐詩十一
已背開簾覽鏡悲難語對面相看孟門阻掩匣
徒慙雙鳳飛懸臺欲効孤鸞舞粧成持照尚當
時只畏愁多遽變衰昔日照來人共許今朝照
罷自生疑鏡上有塵猶可拂君恩詎肯無迴時
南中客舍對雨送故人歸北

猿聲啾啾雁聲苦卷簾相對愁不語幾年客吳
君在楚况送君歸我猶阻家書作得不忍封北
風吹斷堦前雨

杭州秋日留別故友

相見又相別大江秋水深悲歡一世事去住兩

鄉心淅瀝籬下葉淒清堦上琴獨隨孤棹去何
處更同衾

關山月

淒淒還切切戍客多離別何處最傷心關山見
秋月關月音如何由來遠近過始經玄兔塞終
繞白狼河忽憶秦樓婦流光應共有已得並蛾
眉還知攬纖手去歲照同行比翼復連形今宵
照獨立顧影自熒熒餘暉漸西落夜夜看如昨
借問映旌旗何如鑿帷幙拂曉朔風悲蓬驚雁
不飛幾時征戍罷還向月中歸

別友人

愁多不忍醒時別想極還尋靜處行誰遣同衾
又分手不如行路本無情

山行書事

日落風颺颺驅車行遠郊中心有所悲古墓穿
黃茅茅中狐兔窠四面烏鳶巢鬼火時獨出人
煙不相交行行近破村一徑歌還坳迎霜聽蟋
蟀向月看蠨蛸翁喜客來坐客來羞厨庖濁醪
誇撥螳時果仍新苞相勸對寒燈呼兒爇枯梢
性朴頗近古其言無斗筭憂歡世上并歲月途

中拋誰知問津客空作楊雄嘲

古宮怨

窓前好樹名玫瑰去年花落今年開無情春色
尚識返君心忽斷何時來憶昔粧成候仙仗宮
瑣玲瓏日新上拊心却笑西子嚔掩鼻誰憂鄭
姬謗草染文章衣下履花粘甲乙床前帳三千
玉貌休自誇十二金釵獨相向盛衰傾奪欲何
如嬌愛翻悲逐倭諛重遠豈能慙沼鵠弃前方
見泣舩魚看籠不記薰龍腦詠扇空曾禿鼠鬚
始喜類蘿新託栢終傷如薺却甘荼院深獨開

還獨閉鸚鵡驚飛苔覆地滿箱舊賜前日夜漬
枕新垂夜來淚恨多開鏡照還悲綠髻青蛾尚
未衰莫道新縑長絕比猶逢故劍會相追

隴西行

陰雲凝朔氣隴上正飛雪四月草不生北風勁
如切朝來羽書急夜宿長城窟道隘行不前相
呼抱鞍歇人寒指欲墮馬凍蹄亦裂射雁旋充
飢斧冰還止渴寧辭解圍鬪但恐乘疲沒早晚
邊候空歸來養羸卒

代別後夢別

別中還夢別悲後更生悲覺夢俱千里追尋難
再期翻思夢裏苦却恨覺來遲縱是非真事何
妨夢會時

李約三首

汧國公勉之子仕為
尚書兵部員外郎

觀祈雨

桑條無葉土生煙簫管迎龍水廟前朱門幾處
看歌舞猶恐春陰咽管絃

過華清宮

君王遊樂萬機輕一曲霓裳四海兵玉輦升天
人已盡故宮猶有樹長生

城南訪裴氏昆季

相思起中夜夙駕訪柴荆
早霧桑柘隱曉光溪澗
明村蹊蒿棘間往往斷
新耕貧野煙火微晝
無烏鳶聲田頭逢餉人
道君南山行南山千萬
峰盡是相思情野老無
拜揖村童多髀形相呼
看車馬顏色喜相驚
荒圃雞豚樂雨牆禾莠
生欲君知我來壁上空
書名

竇常二首

字中行扶風平陵人左拾遺叔向之子與弟牟
群庠輩俱有名竇曆中為國子祭酒致仕卒

之任武陵寒食日途次松滋渡先寄劉

負外

杏花榆莢曉風前雲際離離上峽船
江轉數程淹驛騎楚曾三戶少人煙
看春又遇清明節筭老重經癸巳年
幸得住山當郡舍在朝長詠卜居篇

北固晚眺

水國芒種後梅天風雨涼露蠶開晚
蒺江燕繞危檣山趾北來固潮頭西
去長年年此登眺人事幾銷亡

竇牟一首

字貽周長慶中為國子司業

秋夕閑居對雨贈別盧七侍御坦

唐詩十一
燕燕辭巢蟬蛻枝窮居積雨壞藩籬夜長簷溜
寒無寢日晏厨煙濕未炊悟主一言那可學從
軍五百竟徒為故人駿馬朝天使洛下秋聲恐
要知

竇群一首

字丹列元和自御史中丞出為黔中
觀察使貶開州刺史徙容管經略使卒

黔中書事

萬事非京國千山擁麗譙佩刀看日曬賜馬傍
江調言語多重譯壺觴每獨謠沿流如著翅不
敢問歸橈

竇庠一首

字胄卿為
婺州刺史

陪留守韓僕射巡內至上陽宮感興
愁雲漠漠草離離太液鈎陳處處疑薄暮毀垣
春雨裏殘花猶發萬年枝

竇鞏八首

字友封元稹為武昌軍節度使辟為
秘書少監兼御史中丞充節度副使

南遊感興

傷心欲問前朝事惟見江流去不迴日暮東風
春草綠鷓鴣飛上越王臺

寄南遊弟兄

書來未報幾時還知在三湖五嶺間獨立衡門
秋水闊寒鴉飛去日銜山

放魚

金錢贖得免刀痕聞道禽魚亦感恩好去長江
千萬里不須辛苦上龍門

宮人斜

離宮路遠北原斜生死恩深不到家雲雨今歸
何處去黃鸝飛上野棠花

代隣叟

年來七十罷耕桑就暖支羸強下床滿眼兒孫
身外事閑梳白髮向殘陽

新營別墅寄兄

嬾性如今成野人行藏由興不由身莫驚此度
歸來晚買得西山正值春

自京師將赴黔南

風雨荊州二月天問人初雇峽中船西南一望
雲和水猶道黔南有四千

永寧小園與校書接近因寄

故里心期奈別何手移芳樹憶庭柯東臯黍熟
君應醉梨葉初紅白露多

唐詩十一
王荆公唐百家詩選卷第十一

王荆公唐百家詩選卷第十二

楊巨源四十六首

王建上二十四首

楊巨源四十六首

送太和公主和蕃

北路古來難年光獨認寒朔雲侵鬢起邊月向
眉殘蘆井尋沙到花門度磧看薰風一萬里來
處是長安

春日奉獻聖壽無疆詞

代是文明晝春當燕喜時鑪煙添柳重宮漏出

花遲漢典方寬律周官正採詩碧霄傳鳳吹紅
旭在龍旗造化膺神契陽和沃聖慈無因隨百
獸率舞奏丹墀

贈鄰家老將

白首羽林郎丁年戍朔方陰天瞻磧路秋日渡
遼陽大漠寒山黑孤城夜月黃十年依蓐食萬
里帶金瘡拂雪陳師祭衝風立教塲箭飛瓊羽
合旗動火雲張虎翼分營勢魚鱗擁陳行誓心
清塞色鬪血雜沙光戰地晴暉薄軍門曉氣長
寇深爭暗襲關迴勒春防身賤竟何訴天高徒
自傷功成封寵將力盡到貧鄉雀老方悲海鷹
衰却念霜空餘孤劍在開匣一霑裳

和練師索秀才楊柳

水邊楊柳綠煙絲立馬煩君折一枝惟有春風
最相惜殷勤更向手中吹

大堤詞

二八嬋娟大堤女開壚相對依江渚待客登樓
向水看邀郎卷幔臨花語細雨濛濛濕芰荷巴
東商侶住帆多自傳芳酒翻紅袖誰調妍妝回
翠蛾珍簟華燈夕陽後當爐理瑟矜纖手月落

星微五鼓聲春風搖蕩窓前柳歲歲逢迎沙岸
間背人多整綠雲鬟無端嫁與五陵少離別煙
波傷玉顏

聖恩洗雪鎮州寄獻裴相公

天借春光洗綠林戰塵收盡見花陰好生本是
君王德忍死何妨壯士心曾賀截雲翻柵遠仍
聞斲凍下營深井陘昨日雙旗入蕭相無言淚
濕襟

上劉侍中

命代生申甫承家翊禹湯廟謨膺間氣師律動

清霜鍾鼎勲庸大河山誠誓長英姿凌虎視逸
步壓龍驤道協陶鈞力恩回日月光一言弘社
稷九命備珪璋政洽軍逾肅仁敷物已康朱門
重祭戟丹詔半縑緗位總興龍野師臨涿鹿鄉
射鵬天更碧吹角塞仍黃深入平夷落橫行關
漢疆功垂貞石遠名映色絲香度磧瞻貌武臨
池識鳳凰舞腰凝綺榭歌響拂雕梁杯淨傳鸚
鵡裘鮮照鷩鷩吟詩白羽扇校獵綠沉槍風景
佳人地煙沙壯士場幕中邀謝監麾下得周郎
珠影含空徹瓊枝映坐芳王渾知武子陳實獎

元方富貴春無限歡娛夜未央管絃隨玉帳樽
俎奉金章俗理寧因勸邊城詎假防軍容雄朔
漠公望冠巖廊分野鄰孤島京坻溢萬箱曙華
分碣石秋色入漁陽城遠迷玄兔川明辨白狼
忠賢多感激今古共蒼茫堤擁紅蕖艷橋分翠
柳行軒車紛自至亭館鬱相當珍簞回煩暑層
軒引早涼聽琴知思靜說劍覺神揚佳景燕臺
上清暉鄭驛傍鼓鍾喧北里珪玉映東牀敢銜
由之瑟甘循賜也牆官微思假路戰勝望升堂
欲奮三年翼頻回一夕腸消憂期酒聖乘興任
道在蒼蒼

郊居秋日酬奚贊府見寄

繁菊照深居芳香春不如閒尋周處士知伴度
尚書日晚汀洲曠天晴草木疎閑言揮麈柄清
步掩蝸廬野老能親牧高人念遠漁幽叢臨古
岸輕葉度寒渠暮色無狂蝶秋華有嫩蔬若爲
酬郢曲從此愧璠璣

上裴中丞

六年西掖弘湯誥三捷東堂總漢科政引風霜

唐詩十二
成物色語回天地到陽和清威更助朝端重聖
澤曾隨筆下多應笑白鬚楊執戟可憐春日老
如何

送裴中丞出使

一清淮甸假朝綱金印初迎細柳黃辭闕天威
和雨露出關春色避風霜龍韜何必陳三略虎
旅由來肅萬方宣諭生靈真重任回軒應問石
渠郎

酬崔駙馬惠牋紙百張兼貽四韻

百張雲樣亂花開七字文頭艷錦回浮碧定從
天上得殷紅應自日邊來捧持價重欺雲葉封
裏香深笑海苔滿篋清光應照眼欲題凡韻輒
徘徊

送司徒童子

衛多君子魯多儒七歲聞天笑舞雩光彩春風
初轉蕙性靈秋水不藏珠兩經在口知名小百
拜垂髫稟氣殊况復元侯旌爾善桂林枝上得
鸚鵡

元日含元殿下立仗丹鳳樓下宣赦上
門下相公二首

唐詩十二
天垂台耀拂欃槍壽獻山青祝聖明丹鳳闕前
歌九奏金雞竿上鼓千聲衣裳南面薰香動文
字東方喜氣生從此登封資廟略兩河連海一
時清

臨軒啓扇似雲收率土朝天劇水流瑞色含春
當正殿香煙捧日在高樓三朝起草迎恩澤萬
歲長聲繞冕旒請問漢家功第一麒麟閣上識
鄼侯

賀田僕射子弟榮拜金吾

五侯恩澤不同年叔姪朱門襮稍連鳳沼九重

相喜氣鴈行一半入祥煙街衢燭影侵寒月文
武珂聲疊曉天為數麒麟高閣上誰家父子勒
燕然

觀打毬

親掃毬場如砥平龍驤驟馬曉光晴入門百拜
瞻雄勢動地三軍唱好聲玉勒回時霑赤汗花
駿分處拂紅纓欲令四海氛煙淨杖底纖塵不
敢生

送人過衛州

憶昔征南府內遊君家東閣最淹留縱橫聯句

唐詩十二
長侵曉次第看花直到秋論舊舉杯先下淚傷
離臨水更登樓相思前路幾回首滿眼青山過
衛州

贈李傅

知因公望掩能文誓激明誠在致君曾罷雙旌
瞻白日猶將一劍許黃雲搖窓竹色留僧語入
院松聲共鶴聞莫被此心生晚計鎮南人憶杜
將軍

送絳州盧使君

應將清靜結心期又共陽和到郡時絳老問年

須筭字度公逢月要題詩朱欄迢遞因高勝粉
堞清明欲下遲他日徵還作霖雨不須求賽敬
亭祠

和裴舍人觀田尚書出獵

聖代司空比玉清雄藩觀獵見皇情雲禽已覺
高無益霜兔應知狡不成飛鞚擁塵寒草盡彎
弓開月朔風生今朝始賀將軍貴紫禁詩人看
旆旌

送李舍人歸蘭陵里

清詞舉世皆藏篋美酒當山為滿罇三畝嫩蔬

唐詩十一
臨綺陌四行高樹擁朱門家貧境勝心無累名
重官閑口不論惟有道情常自足啓期天地易
知恩

和人與人分惠賜冰

天水藏來玉墮空先頒密署幾人同映盤皎潔
非關露當扇清涼不在風瑩質方從綸閣內凝
輝更借錦帷中麗詞珍貺難雙有迢遞金鑾殿
角東

寄中書同年舍人

晴明紫閣最高峰仙掖開簾范彥龍五色天書

詞煥爛九華春殿語從容綵毫應染鑪煙細清
珮仍含玉漏重二十年前同日喜碧霄何路得
相逢

早春即事呈劉員外

明朝晴暖即相隨肯信春光被雨欺且任文書
堆案上免令杯酒負花時馬蹄經歷應須遍鶯
語丁寧已怪遲更待雜芳成豔錦鄴中爭唱仲
宣詩

酬于駙馬二首

綺陌塵香曙色分碧山如画又逢君蛟藏秋月

唐詩十一
一片水驥鎖晴空千尺雲威里舊知何駙馬詩
家今得鮑參軍陽和本是煙霄曲須向花間次
第聞

芳時碧落心應斷今日清詞事不同
瑶草秋殘仙圃在綵雲天遠鳳樓空
晴花曾送金羈影涼葉還生玉簟風
長得聞詩懽自足會看春露濕蘭叢

和侯大夫秋原觀征人回

兩河罷戰萬方清原上軍回識舊營
立馬望雲秋塞淨射鵬臨水晚天晴
戍閑部伍分岐路地

遠家鄉寄旆旌聖代止戈資廟略
諸侯不復更長征

同太常尉遲博士闕下待漏

沉沉延閣抱丹墀松色苔花顥露滋
爽氣曉來青玉甃薰風宿在翠花旗
方瞻御陌三條廣猶覺仙門一刻遲
此地含香從白首馮唐何事怨明時

見薛侍御戴不損裏帽子因贈

潘郎對青鏡烏帽似新裁曉露鴉初洗
春荷葉半開堪將護巾櫛不獨隔塵埃
已見籠蟬翼無

唐詩一
因映鹿胎何人呈巧思好手自西來有意憐衰
醜煩君致一枚

寄昭應王丞

武皇金輅輾香塵每歲朝元及此辰光動泉心
初浴日氣蒸山腹總成春謳歌已入雲韶曲詞
賦方歸侍從臣瑞靄朝朝猶望幸天教赤縣有
詩人

將歸東都別令狐舍人

綠楊紅杏滿城春一騎悠悠萬井塵岐路未關
今日事風光欲醉長年人閑過綺陌尋高寺強

到朱門謁近臣多病晚來還有策洛陽山色舊
相親

寄江州白司馬

江州司馬平安否惠遠東林住得無湓浦曾聞
似衣帶廬峰見說勝香爐題詩歲晏離鴻斷望
闕天遥病鶴孤莫謾勾牽雨花社青雲依舊是
前途

薛司空自青州歸朝

天眷君陳久在東歸朝人看大司空黃河岸畔
長無事滄海東邊獨有功已變畏途成雅俗仍

唐詩十二
過舊里揖清風一門累葉凌煙閣次第儀形漢
上公

送章孝標校書歸杭州因寄白舍人

曾過靈隱江邊寺獨宿東樓看海門潮色銀河
鋪碧落日光金柱出紅盆不妨公事資高臥無
限詩情要細論若訪郡人徐孺子應須騎馬到
沙村

述舊紀勲寄太原李侍中光顏二首

玉塞含悽見雁行北垣新詔拜龍驤弟兄間世
真飛將貌虎歸時似故鄉鼓角因風飄朔氣旌

旗映水發秋光河源收地心猶壯笑向天西萬
里霜

倚天長劍截雲孤報國縱橫見丈夫五載登壇
真宰相六重分閫正司徒曾聞轉戰平堅寇共
說題詩壓腐儒料敵知機在方寸不勞心力講
陰符

胡二十拜戶部兼判度支

清機果被公材撓雄拜知承聖主恩廟略已調
天府實國征方覺地官尊徒言玉節將分閫定
是沙隄欲到門爲愛山前新卜第不妨風月事

琴樽

酬裴舍人見寄

誰道重遷是舊班自將霄漢比鄉關
二妃樓下宜臨水五老祠西好看山
再葺吾廬心已足每來公府跡常閑
詩陪亞相逾三紀石筍煙霞不共攀

早朝

鍾傳清禁纔應徹漏報仙闈儼已開
雙闕薄煙籠菡萏九城初日照蓬萊
朝時但向丹墀拜仗下方從碧落回
聖代逍遙更何事願將巴曲贊

康哉

元日呈元逢吉舍人

華夷文物賀新年霜仗遙排鳳闕前
一片綵霞迎曙日萬條紅燭動春天
稱觴山色和元氣端冕爐香疊瑞煙
共說正初當聖澤試過西掖問群賢

酬盧負外

話舊感往年相國河東張公弘靖常臨北府忝寮屬之末君有鄉里之親有作

謝傳旌旄控上游盧郎樽俎借前籌
舜城風土臨清廟魏國山川在白樓
雲寺當時接高步水亭今日又同遊
滿筵舊府笙歌在獨有羊曇最

唐詩十二
十一
淚流

述美寄申州盧拱使君

領郡仍聞倅虎貔致身還是見男兒小船隔水
催桃葉大鼓當風舞柘枝酒座微酣諸客倒毬
場慢撥幾人隨從來樂事憎詩苦莫被窓中遠
岫知

贈張將軍

關西諸將揖容光獨立營門劍有霜知愛魯連
歸海上肯令王翦在頻陽天晴紅幟當山滿日
暮清笳入塞長年少功高人最美漢家壇樹月

蒼蒼

酬崔博士

自知頑叟更何能唯學雕虫謬見稱長被有情
邀唱和近來無力更祇承青松樹杪千年鶴白
玉壺中一片冰今日為君書壁右孤貞莫怕世
人憎

古意贈王常侍

繡戶紗窓北里深香風暗動鳳皇簪組紉長在
佳人手刀尺空搖寒女心欲學齊謳逐雲管還
思楚練拂霜砧東家少婦當機織應念無衣雪

滿林

和杜中丞西禪院看花

一林堆錦映千燈
照眼牽情欲不勝
知倚晴明嬌自足
解將顏色醉相仍
好風輕引香煙入
甘露纔和粉艷凝
深處最怜鶯蹂踐
嫩時先被蝶侵凌
對持真境應無取
分付空門又未能
迎日似翻紅燒斷
臨流疑映綺霞層
幽舍晚態憐丹桂
盛續春光識紫藤
每到花枝獨惆悵
山東唯有杜中丞

王建上二十四首

太和中爲
陝州司馬

送人

白日向西沒
黃河復東流
人生足著地
寧免四方遊
我行無返顧
祝子勿回頭
當須向前去
何用起離憂
但恐無廣路
平地作山丘
令我車與馬
欲疾反停留
蜀客多積貨
邊人競封侯
男兒戀家鄉
懽樂爲仇讐
丁寧相勸勉
苦口幸無尤
對面無相成
不如豺虎儔
彼遠不寄書
此寒莫寄裘
與君俱絕跡
兩念無因由

將歸故山留別杜侍御

有川不得涉
有路不得行
沉沉百憂中
一日如

唐詩十二
一生錯來干諸侯石田廢春耕虎戟衛重門何
因達中誠日月俱照耀山川異陰晴如何百里
間開目不見明我今歸故山誓與草木並願君
去丘坂長使道路平

上七泉寺上方

長年好名山本性今得從回看塵土遙稍見麋
鹿蹤老僧雲中居石門青重重陰泉養成龜古
壁飛却龍掃石禮新經懸幡上高峰日夕猿鳥
合覓食聽山鍾將火尋遠泉煮葎傍寒松晚隨
采藥人便宿南澗中晨起衝露行濕花枝茸茸
歸依向禪師願作香火翁

溫門山

早入溫門山群峰亂如戟崩崖欲相觸呀豁斷
行跡脫履尋淺流定足畏欹石路盡十里溪地
多千歲栢洞門晝陰黑深處惟石壁似見丹沙
光亦聞鍾乳滴靈池出山底沸水衝地脉暖氣
成濕煙濛濛窓中白隨僧入古寺便是雲外客
月出天氣涼夜鍾山寂寂

酬栢侍御聞與韋處士同遊靈臺寺見
寄

西域傳中說靈臺屬雍州有泉皆聖跡有石皆
佛頭所出蒼葡萄香外國俗來求毒蛇護其下樵
者不可偷古碑在雲顛備載置寺由魏家移下
來後人始增修近與韋處士愛此山之幽各自
具所須竹籠盛茶甌牽馬過危棧襍衣涉奔流
草開平路盡林下大石稠回廊轉經峰忽見東
西樓瀑布當寺門迸落衣裳秋石苔鋪紫花溪
葉裁綠油松根載殿高飄飄仙山浮縣中賢大
夫一月前此遊賽神荷得雨豈暇多停留二十
韻新詩遠寄尋山儔清令玉礪泣冷切石磬愁

君名高難閑余身愚終休相將長無因從今生
離憂

送韋處士老舅

憶昨癡小年不知有經籍常隨童子遊多向外
家劇偷花入鄰里弄筆書墻壁照水學梳頭應
門未穿幘人前賞文性梨果蒙不惜賦字詠新
泉探題得幽石自從出關輔三十年作客風雨
一飄飄親情多阻隔如何二千里塵土驅衰瘠
良久陳苦辛從頭嘆衰白既來今又去暫笑還
成感落日動征車春風卷離席雲臺觀西路華

唐詩十二
嶽祠前栢會得過帝鄉重尋舊行跡

邯鄲主人

遠客無主人夜投邯鄲市飛蛾繞殘燭半夜人
醉起壚邊酒家女遺我緗綺被合成雙鳳花宛
轉不相離縱令顏色故勿遣合歡異一念始為
難萬金誰足貴門前長安道去者如流水晨風
群鳥翔徘徊別離此

泛水曲

載酒入煙浦方舟泛淥波子酌我復飲子飲我
還歌蓮深微路通峰曲幽氣多閱芳無留瞬弄

桂不停柯水上秋日鮮西山碧峨峨茲歡良可
貴誰復更來過

題壽安南館

明蒙竹間亭天暖幽桂碧雲生四面山水接當
堦石濕樹浴鳥痕破苔臥鹿跡不緣塵駕觸堪
作商皓宅

江南新體二首

江上風脩脩竹間湘水流日夜桂花落行人去
悠悠復見離別處蟲聲陰雨秋

處處江草綠行人發瀟湘瀟湘回雁多日夜思

唐詩十二
故鄉春夢不知數空山蘭蕙芳

涼州行

涼州四邊沙皓皓漢家無人開舊道邊頭州縣
盡胡兵將軍別築防秋城萬里征人皆已沒年
年旌節發西京多來中國收婦女一半生男為
漢語蕃人舊日不耕犁相學如今種禾黍驅羊
亦著錦為衣為惜氍裘防鬪時養蠶繅繭成匹
帛那將繞帳作旌旗城頭山雞鳴角角洛陽家
家教胡樂

寒食行

寒食家家出古城老人看屋少年行丘壠年年
無舊道車徒散行入衰草牧童驅牛下塚頭畏
有家人來洒掃遠人無墳水頭祭還引婦姑望
鄉拜三日無火燒紙錢紙錢那得到黃泉但看
壠上無新土此中白骨應無主

促刺詞

促促復刺刺水中無魚山無石少年雖嫁不將
歸白頭猶著父母衣四邊田宅非所有我身不
及逐雞飛出門若有歸死處猛虎當衢向前去
百年不遣踏君門在家誰喚為新婦豈不見他

唐詩一
六
隣舍娘嫁來長在舅姑傍

隴頭水

隴水何年隴頭別不在山中亦嗚咽征人塞耳
馬不行未到隴頭聞水聲謂是西流入蒲海還
聞北去繞龍城隴東隴西多屈曲野麋飲水長
簇簇胡兵夜回水傍住憶著來時磨劍處向前
無井復無泉放馬回看隴頭樹

北邙行

北邙山頭少閑土盡是洛陽人舊墓舊墓人家
歸葬多堆著黃金無買處天涯悠悠葬日促岡

坂崎嶇不停轂高張素幕繞銘旌夜唱挽歌山
下宿洛陽城北復城東魂車祖馬長相逢車轍
廣若長安路蒿草少於松柏樹山頭澗底石漸
稀盡向墳前作羊虎誰家石碑文字滅後人重
取書年月朝朝車馬送葬回還起大宅與高臺

溫泉宮行

十月一日天子來青繩御路無塵埃宮前內裏
湯各別每箇白玉芙蓉開朝元閣向山上起城
繞青山龍煖水夜開金殿看星河宮女知更月
明裏武皇得仙王母去山雞晝鳴宮中樹溫泉

決決出宮流宮使年年修玉樓禁兵去盡無射
獵日西麋鹿登城頭梨園弟子偷曲譜頭白人
間教歌舞

春詞

紅煙滿戶日照梁天絲軟弱蟲飛揚菱花霍霍
繞帷光美人對鏡著衣裳庭中並種相思樹夜
夜還栖雙鳳皇

遼東行

遼東萬里遼水曲古戍無城復無屋黃雲蓋地
雪作山不惜黃金貴衣服戰回各自收弓箭正

西回面家鄉遠年年都郡送征人將與遼東作
丘坂寧爲草木鄉中生有身不向遼東行

塞上梅

天山路傍一株梅年年花發黃雲下昭君已沒
漢使回前後征人唯繫馬日夜風吹滿隴頭還
隨隴水東西流此花若近長安路九衢年少無
攀處

戴勝詞

戴勝誰與爾爲名木中作窠墻上鳴聲聲催我
急種穀人家向田不歸宿紫冠綵綵褐羽斑銜

得蜻蜓飛過屋可憐白鷺滿綠池不如戴勝知
天時

鞦韆詞

長長絲繩紫復碧嫋嫋橫枝高百尺少年女兒
重鞦韆盤巾結帶垂兩邊身輕裙薄易生力雙
手向空如鳥翼下來立定重繫衣復畏斜風高
不得旁人送上那足貴終賭明璫鬪自起回回
若與高樹齊頭上寶釵從隨地眼前爭勝難爲
休足踏平地看始愁

開池得古釵

美人開池北堂下拾得寶釵金未化鳳皇半在
雙股齊鈿花落處生黃泥當時墮地覓不得暗
想窓中還夜啼可知將來對夫壻鏡前學梳古
時髻莫言至死亦不遺還似前人初得時

賽神曲

男抱琵琶女作舞主人再拜聽神語新婦上酒
勿辭勤使爾舅姑無所苦椒漿湛湛桂座新一
雙長箭繫紅巾但願牛羊滿家宅十月報賽南
山神青天無風水復碧龍馬上鞍牛服鞞紛紛
醉舞蹈衣裳把酒路傍勸行客

王荊公唐百家詩選卷第十二



